

華嚴 1939~1942 集講義

修華嚴奧旨妄盡還源觀

入五止

一者，照法清虛離緣止。謂觀照真俗二諦之法，空有不二，清淨虛廓，能緣之智既寂，而所緣之境亦亡也。

二者，觀人寂泊絕欲止。謂觀五蘊之身，諸法本空，寂然淡泊，諸欲皆盡，無願無求也。

三者，性起繁興法爾止。謂依體起用，名為性起，應用萬差，故曰繁興，任運常然，名法爾也。

四者，定光顯現無念止。謂入此三昧中，光明炳現，內外洞徹，無思無慮也。

五者，理事玄通非相止。謂真性之理，幻相之事，隱顯俱融，性相雙泯也。